

## 開放文學 – 歷代筆記 – 奴才小史 趙爾豐

趙爾豐者，爾巽之弟，漢軍人也。宣統元年時，尚為駐藏辦事大臣。三年春，乾路國有之政策定，川人起爭之。是時代理川督者為王文韶，而爾豐猶未至也。嗣以王文韶袒川人，與政府相持。郵傳大臣盛宣懷惡之，請旨嚴飭。尋以趙爾豐荷任川督。爾豐之蒞川也，繼王文韶奏劾盛宣懷之後，民氣異常發展，知其不可壓制，故代川紳具奏。已而盛宣懷假朝旨申斥，鄂督瑞澂、督辦端方，復連電劾之。爾豐進退失據，又變而迎合宣懷。遂於七月十五日，以東請諸紳會議要事為名，而將蒲殿俊等十人捕入督署。時諸人正於鐵路公司開會，既被詐捕入署，即與抗爭。爾豐大怒，欲殺未能，乃令親軍拘禁之。時諸紳為眾望所歸，既被拘，群情大憤，聲若鼎沸，不約而同，咸往督署請釋。爾豐令親軍開槍逐之，先後斃者四十餘人。眾益憤，圍守督署，以死求釋諸紳。爾豐不允，並以軍隊遍紮各街，勒令各街開市，各街仍寂然。爾豐怒曰：「我不是趙爾豐，卻是張獻忠，若不開市，與我剿兩條街，則自然皆開市。」此趙屠之謔所由來也。及爾豐既激變，反妄報民亂，且執自治商榷書，誣咨議局議長為首要。迨清旨派岑春煊赴川，又不自安。蓋恐春煊一至，事難掩飾。遂鋪張戰功，謂川亂收平，冀惑政府，以止春煊之行。然政府已疑其所奏不實，由攝政王諭軍咨府，派員至川，激查真相。旋由給事中陳田等十二人交章劾之，而爾豐之技乃窮。